

續通鑑綱目

拾遺



末卷



漢書門			
二	一	八	二
八	〇	九	一
冊	架	函	號

內閣文庫			
二		二	漢
〇		一	書
六	二	八	
架	冊	號	類

內閣文庫		
番號	漢	2187
冊數	28 ( 28 )	
函號	284	6





治通鑑綱目續編卷之末

元四明陳隆拾遺  
淺草文庫

辛酉 唐昭宗皇帝天復元年契丹痕德董可汗以

耶律阿保機為夷裔董

初炎帝之裔曰葛克烏世雄朔漠號東胡匈奴冒頓單于襲破之餘眾保鮮卑山魏青龍中幽州刺史王雄殺其酋比能眾散徙潢水至酋莫那遷於遼西九傳而為慕容晃所破分其眾為三曰宇文曰庫莫奚曰契丹元魏初眾稍滋蔓而契丹酋奇首居潢河土河之間有子八人各自為部高句驪悉然謀擊之大酋莫弗賀勿於懼率部落三千乘請附於魏

因居白狼水東。唐初大酋號大賀氏，有勝兵八萬。貞觀中，太宗伐高麗，首領窟哥來朝，詔分其地爲十州，以其部長爲刺史，拜窟哥爲松漠都督，賜姓李氏，統領其衆。窟哥歿，其孫盡忠叛。武后遣師二十萬，連年乃克。餘衆附於突厥。開元中，盡忠從弟失活請降，詔復以爲都督。失活傳沙固，沙固爲衙官。可汗于所殺弟鬱于嗣，鬱于歿，弟咄于嗣，可突于復逐之。部人共立咄于之弟邵固，可突于殺邵固而立屈列，以附於突厥。幽州刺史張守珪討殺可突于，詔封其別部長過折爲北平王，以統大賀氏諸部。可突于之黨雅里殺過折而立連輦組里爲阻午可汗，改號遙輦氏。雅里自爲迭刺部，輔阻午以爲政，始立制度，設官

分地，刻木爲契，穴地爲牢焉。雅里者，本奇首之後，居潢河濱，號審吉氏。及易氏迭刺因譯其始興之地，世里爲耶律而姓之。天寶四年，詔賜阻午姓名曰李懷秀，仍爲松漠都督。懷秀尋叛，詔更封別部長楷落爲恭仁王，以代懷秀。楷落自稱契丹王，會安祿山反，朝貢阻絕。其世次莫得而詳，或言其國凡八部，常推其一部大人建旗鼓以主號令。然其所稱耶瀾可汗、屈戌、已刺可汗、習爾之類，不知何部大人也。是年，習爾死，其族人欲德立，是爲痕德董可汗。痕德董之世，諸部多微，而迭刺部自雅里以後，世爲遙輦氏。夷離董掌其國政，雅里子曰毘牒，毘牒生頽領，頽領生禡里思。大度寡欲，令嚴衆附，部益盛。強禡里思

薩刺德薩刺德生勻德實教民稼穡善畜牧  
部以殷富勻德實生撒刺的始教民鼓鑄其  
弟述瀾又善用兵於厥室韋奚霫畏服之初  
築城邑屋廬以居樹藝桑麻以織組焉阿保  
機撒刺的長子也小字啜里只生而英異初  
為撻馬狝沙里猶中國扈從官也數立功國  
人服之號為阿主沙里至是授大迭烈府夷  
離董得專用兵遂大破室韋于厥及奚諸國  
夷離董掌部族軍民之  
政猶中國使相也

**壬戌**二年秋七月契丹阿保機寇河東代北陷九  
郡九月城龍化州

阿保機率衆四十萬寇河東代北陷九郡  
生口九萬五千九月城其始祖奇首故地漢  
河之南古漢安平縣為龍化州以  
處所俘中國之民始建開教寺

**契丹作西樓于世沒里**

契丹之先草居野次靡有定所阿保機始於  
遼右八部世沒里之地建西樓以為遊獵之  
所

**癸亥**三年秋九月契丹阿保機寇河東陷懷遠軍

阿保機攻女真降之獲其戶三百九月寇河  
東陷懷遠十月東掠薊北而去先是撒次的

俘奚七千戶徙饒樂之清河至  
是創為奚迭刺部分十三縣

冬十月契丹以阿保機為于越總知國事遂作

東樓于龍化州

于越契丹至貴之職非有大功德者不授阿  
保機乃廣龍化州之東城建東樓以紀功

**天祐元年秋九月契丹阿保機侵室韋盧龍**

節度使劉仁恭遣師救之敗績

阿保機攻黑車子室韋劉仁恭使養子趙霸  
救之遇於武州霸兵大敗被執阿保機乘勝

大破  
室韋

乙丑昭宣帝天祐二年秋八月晉王李克用遣使

如契丹九月契丹阿保機會晉王于雲中

李克用遣康令德通好于阿保機九月阿保  
機以騎兵七萬會克用于雲中約為兄弟宴  
甚驩克用因與會師進擊劉仁恭拔數州盡  
徙其民復期共擊朱全忠阿保機許之已而  
或勸克用乘間拘阿保機于會克用不許曰  
讎敵未滅而失信夷狄自以之道也阿保機  
既去聞之乃背盟更附  
朱全忠克用由是怨之

丙寅三年春二月朱全忠遣使如契丹。冬十一

月契丹阿保機侵奚霫女真諸部降之。○十二

月契丹痕德董可汗欽德歿

**丁卯** 梁太祖朱晃開平元年。○契丹太祖耶律億元年是歲唐亡梁代。春正月契

**丹耶律阿保機稱帝更名億**

痕德董可汗既歿其眾請阿保機為可汗阿保機未從耶律曷魯曰機不可失也阿保機乃命設壇於如迂王集會搗燔柴告天即皇帝位北宰相蕭轄剌南宰相耶律歐理思率

其下上尊號曰天皇帝后述律氏曰地皇后阿保機更名曰億以曷魯總軍國事

二月契丹侵黑車子室韋降之。○夏四月梁王

朱全忠稱皇帝于汴州更名是廢唐帝為濟陰

王

**戊辰** 梁開平二年冬十月契丹作明王樓

樓在世沒里與西樓相近

**己巳** 梁開平三年春二月梁使郎公遠如契丹。○

資治通鑑綱目賈編 梁太祖開平元年

五

黃心

三月契丹舍利素會滄州劉守文之師伐幽州

敗劉守光于北海口

幽州節度使劉仁恭為其子守光所囚義昌節度使劉守文守光兄也發兵討之互有勝負守文乞師於契丹契丹主使舍利素以兵會焉次于北海口守光一鼓破之守光潰去因名北海口為會盟之口

契丹以韓知古為左僕射


知古薊州玉田人有識量年六歲為契丹述律后兄欲穩所虜以媵后焉久之未得省快

快挺身逃去為人庸保以自給會其子因問言之契丹主召與語賢其才命參謀信任日篤至是拜左僕射總知漢人司事兼主諸國禮儀時儀法疏濶知古參酌國俗與漢儀雜就之使國人易知而可行遂建碑龍化州大廣寺以紀契丹主之功德

契丹以蕭敵魯為北府宰相

敵魯契丹主后之弟也自是后族世為此職

庚午 梁開平四年夏四月梁夏州亂殺節度使李





彝昌以其族父仁福代之

初拓跋赤辭以部落歸於唐太宗賜姓李氏  
置靜邊等州以處之其析居夏州者號平夏  
部黃巢之亂夏州偏將拓跋思敬以功復賜  
國姓拜定難軍節度使有夏銀綏宥靜五州  
世襲其職至是其將高  
宋益殺彝昌而立仁福

辛未

梁乾化元年春正月契丹侵奚霫盡取其地

凡六國五鎮契丹主攻西部所向輒克遂分兵攻東奚亦  
平之於是盡取奚霫之地東際海南暨白檀  
西踰松漠北抵潢水凡五部  
咸入版籍還次灤河勒石焉

夏五月契丹主之弟刺葛等謀亂盟而釋之

契丹主有弟五人曰刺葛曰迭刺哥曰寅底  
右曰安端曰蘇刺葛性愚險好亂與諸弟謀  
反安端妻粘睦姑以事聞契丹主不忍加  
誅召諸弟登山刑牲告天地為誓而赦之

壬申 梁乾化二年冬十月契丹主之弟刺葛等復

謀亂釋不治


刺葛復與諸弟謀作亂會契丹主攻木不姑  
還次北阿魯山諸弟以兵阻其歸路契丹主  
乃南趨赤水河諸弟  
各遣人謝罪命釋之

癸梁王瑱乾化三年凡六國五鎮春三月契丹王之弟刺葛等

反誅其黨而釋之

三月契丹王次蘆水迭刺哥圖為奚王與安端擁千餘騎詐言來覲契丹王知其謀至則拘之而分其部隸諸軍刺葛率眾至乙室董淀具天子旗鼓將自立會弭姑乃懷里陽言契丹王兵且至眾遂驚潰掠居民北走契丹王以兵追之刺葛寅底石引眾徑逼行帳焚輜重廬幕縱兵大殺述律后急遣蜀古魯救之僅得天子旗鼓而已其黨神速始復劫西樓焚明王樓契丹王至土河命秣馬休兵諸將請急追之契丹王曰伺其遠遁人各懷土

懷土既切其心必離我軍乘之破之必矣四月追刺葛及於培只河盡獲其輜重生口遂進擊之刺葛逆戰而敗焚其車乘廬帳而去遇契丹王所伏兵復大敗乃遺其所奪神張於路而奔五月至榆河與涅里衮阿鉢被獲寅底石自剄不殊契丹王還時大軍久在道輜重不相屬士卒煮馬駒採野菜以為食孳畜道斃者什七八物價十倍器物資貨委棄於楚里河狼籍數百里因更刺葛名暴里涅里衮投崖而死有司鞫獄逆黨凡三百人契丹王曰人命至重死者不可復生其賜宴一日隨其平生之好使為之酒酣或歌或舞或戲射角觥各極其意明日乃以輕重論刑契丹王猶不忍寘諸弟於法杖刺葛迭刺哥而



釋之謂寅底石安端性庸弱為刺葛所勝而然皆赦不治因謂左右曰謀逆若止負朕躬尚可容貸此曹恣行不道殘害忠良剽掠財產民間昔有萬馬今皆徒步開國以來未嘗有也不誅其黨何以示戒

### 冬十一月契丹初議朝政定禮儀

**丙**梁乾化四年凡六國五鎮

**乙**梁貞明元年凡六國五鎮冬十月吳越遣使如契丹○高

### 麗遣使如契丹

**丙**梁貞明二年○春二月契丹大赦建元

契丹主在龍化州迭刺部夷離董耶律曷魯等率群臣上尊號曰大聖大明天皇帝述律后曰應天大明地皇后大赦建元神冊○述律后名平小字月裡朶其先回鶻人世居契丹右八部父曰睿我梅里后簡重果斷有雄略契丹主行兵御衆多預謀策有母有姑皆踞榻受其拜曰吾惟拜天不拜人也時晉王李存勗方經營河北欲結契丹為援以叔父事契丹主叔母事后云○契丹初因突厥稱后曰可敦謂之臆俚寒尊稱曰耨斡屨蓋以配后土而毋之云○契丹之后族多乙室氏拔里氏契丹主慕漢高祖命耶律兼稱劉氏

三百九十一

范有光

后弟敵魯既為北府宰相遂自比蕭相國由是與乙室拔里兼稱蕭氏

三月契丹主立其子倍為太子

倍小字宋欲

夏四月晉幽州節度使盧國用降于契丹○秋

七月契丹主侵突厥吐渾党項小蕃沙陀諸部

悉降之

俘其酋長及戶萬五千六百鎧甲兵仗器服九十餘萬寶貨駝馬牛羊無筭

八月契丹陷晉朔州

獲節度使李嗣本

冬十月契丹陷晉蔚武媯儒州遂盡有代北之地

地

契丹既陷朔州乘勝而東攻陷蔚武媯儒四州斬首萬五千自代北至河曲踰陰山盡有其地改武州為歸化州媯州為可汗州置西南招討司選有功者領之

十二月契丹取晉山北八軍

初幽州北七百里有渝關下有渝水通海自關東北循海有道道狹處纜數尺旁皆亂山高峻不可越舊置八防禦軍募土兵守之田租皆供兵食歲致繒纊以為衣常早獲清野以待契丹契丹至則閉壁不戰伺其去選驍勇據隘邀之契丹常失利走土兵皆自為田園力戰有功則賜勲加賞由是契丹不敢輕入寇及周德威鎮廬龍恃勇不修邊備入軍遂為契丹所有渝關之險反為敵利契丹每芻牧於營平之間德威又忌幽州舊將有名者往往殺之吳王楊行密嘗遣契丹主以猛火油曰此油然火得水愈熾可以攻城契丹主大喜即選騎欲攻幽州述律后晒之曰豈有試油而攻一國乎但以三千騎伏其旁掠其

四野使城中無食不過數年城自困矣何如此躁動輕舉萬一不勝為中國笑吾部落亦解體矣乃止

**丁卯** 梁貞明三年 春二月晉新州防禦使李存矩為

**其下所殺裨將盧文進奔契丹**

存矩晉王之弟也晉王使募山北部落及劉守光士卒存矩自部送之盧文進為裨將行者皆憚遠役至祁溝關小校宮存矩與士卒謀遂殺存矩文進率其麾下以奔契丹焉

**三月契丹圍晉幽州夏四月晉李嗣源會師救**

之秋八月契丹敗走

卷之三十三 契丹傳 三十九

盧文進導契丹攻新州刺史安金全棄城遁契丹命劉殷守之三月進攻幽州節度使周德威合幽州鎮定魏五州兵拒之契丹王自率眾三十萬赴焉戰於新州東斬首三萬德威奔還幽州契丹乘勝圍之德威告急於晉王晉王方與梁相持河上欲分兵則兵少欲勿救恐失之謀於諸將獨李嗣源李存審聞實勸王救之王喜曰昔太宗得一李靖猶擒頡利今吾有猛將三人復何憂哉存審寶以敵無輜重勢不能久不若伺其還而擊之嗣源曰德威社稷之臣今朝夕不保恐變生於中何暇待虜之衰臣請身為前鋒以赴之

曰公言是也即日治兵四月命嗣源先進實以鎮定兵繼後幽州受圍日久德威力守契丹主見城中有氣如烟火狀曰未可下也會大暑霖潦乃先歸畱於越曷魯守之城中危困日甚嗣源等步騎七萬會於易州存審曰虜眾吾寡虜多騎吾多步若平原相遇虜以萬騎蹂吾陣吾無遺類矣嗣源曰虜無輜重吾行必載糧食自隨若平原相遇虜抄吾糧吾不戰自潰矣不若自山中潛行趣幽州若中道遇虜則據險拒之遂踰嶺而東嗣源與養子從珂將三千騎為前鋒距幽州六十里與契丹遇力戰得進至山口契丹以萬騎遮其前將士失色嗣源以百餘騎先進免胄揚鞭胡語謂曰汝無故犯我疆場晉王命我將

資治通鑑綱目 卷之三十三 契丹傳 三十九 真

百萬衆直抵西樓滅汝種族因躍馬奮擣三  
入其陣斬酋長一人後軍齊進契丹兵却晉  
兵始得出存審命步兵伐木爲鹿角人持一  
枝止則成寨契丹騎環寨而過寨中發萬弩  
射之人馬死傷塞路將至幽州契丹列陣待  
之存審以步兵陣於其後戒勿動先令羸兵  
曳柴燃草而進烟塵蔽天鼓躁合戰乃趣後  
陣起乘之契丹大敗俘斬萬計嗣源等遂入

幽州

### 契丹刺萬出奔晉幽州

戊寅梁貞明四年春二月達旦遣使奉貢于契丹  
寅凡七國四鎮

### ○契丹城臨潢以爲都

契丹既作西樓復於漢西安平之地取天梯  
別魯等三山之勢於韋甸射金齒箭以識之  
謂之龍眉宮至是命禮部尚書康默記城之  
爲皇都其地沃壤負山抱海宜耕植便畜牧

### 夏五月契丹主作孔子廟親謁之

契丹主問左右曰受命之君當事天敬神有  
大功德者朕欲祀之何先皆以佛對契丹主  
曰佛非中國教太子倍曰孔子大聖萬世所  
尊契丹主大悅卽命建孔子廟及佛寺道觀  
既成契丹主親謁孔子廟  
命其后及太子分謁寺觀

秋七月契丹于越耶律曷魯卒

己卯梁貞明五年凡七國四鎮春二月契丹城遼陽

以漢民渤海戶實之改為東平郡

庚辰梁貞明六年春正月契丹始製大字

九月字成命頒行之

秋九月契丹侵天德節度使宋瑤降之

辛巳梁龍德元年凡七國四鎮春正月契丹主以其弟蘇為南

府宰相

自是宗室世為此職

夏五月契丹定班爵法律○契丹主命繪前代

直臣像為招諫圖○冬十月晉王郁以契丹寇

定州十二月晉王救之契丹敗走

晉義武節度使王處直以養子都為嗣其孽子郁怨都冒繼其宗會晉王討成德叛將張文禮處直以鎮定唇齒恐鎮亾而定孤乃潛遣郁賂契丹犯塞以緩鎮州之圍郁遂邀處



直求為嗣。處直許之。郁即率所部朝於契丹。契丹主時次居庸關。分兵略檀順安遠三河。良鄉望都潞蒲城遂城等十餘城。俘其民徙於境內。因呼郁為子。遷其眾於潢水之南。而令其太子倍與郁率兵趣定州。略地義武軍府。怨處直召契丹主。都亦慮郁奪其處。乃同幽處直而盡殺其子孫。心腹以狀白於晉王。晉王即以都代處直。處直憂憤而卒。十二月。契丹攻幽州。李紹宏嬰城自守。契丹遂圍涿州。即日破其郭。刺史李嗣弼以城降。契丹進攻定州。王都告急于晉。晉王帥兵五千救之。至新城。半出桑林。契丹驚走。晉王分軍逐之。契丹舉眾退保望都。晉王趨之。遇契丹將禿靺五千騎為其所圍。力戰數合不能出。李嗣

昭以騎三百來赴禿靺。少却。晉王乃得出。因縱兵奮擊。契丹大敗。逐北至易州。會大雪。彌旬平地數尺。契丹人馬死相屬。晉王躡其後。見契丹野宿之所。布橐於地。回環方正。皆如編翦。雖去無一枝亂者。嘆曰：虜用法嚴。乃能如是。中國所不及也。晉王至幽州。使騎一百踵契丹而北。戒曰：虜出境即還。騎恃勇進擊。悉為所擒。初王郁說契丹主曰：鎮州美女如雲。金帛如山。天皇王速往。則皆已物也。不然。為晉王所有矣。述律后曰：吾有西樓羊馬之富。其樂不可勝窮也。何必勞師遠出。以乘危徼利乎。吾聞晉王用兵。天下莫敵。脫有危敗。悔之何及。契丹主不聽。及敗。契丹主繫郁以歸。

壬 梁龍德二年。夏四月契丹陷晉薊州。○晉

師圍鎮州張文禮求救于契丹契丹迭烈救之

晉李嗣昭敗歿。○冬十一月契丹堯骨侵薊北

堯骨契丹主第二子也至是授天下兵馬大元帥攻薊北

癸 唐莊宗李存勗同光元年。春正月契丹堯

骨陷晉平州二月契丹以盧國用為盧龍節度

使

堯骨克平州獲刺史趙思溫二月契丹主如

平州以州為盧龍軍授盧國用節度使守之

國用即盧文進也自是晉幽薊之境

歲被殺掠吏民殘弊不能自生矣

夏四月晉王李存勗稱皇帝于魏州國號唐。○

契丹堯骨侵晉鎮州陷曲陽。○冬十月唐主滅

梁

甲等部

甲 唐同光二年。夏六月契丹主侵吐渾党項阻

申 凡五國四鎮

契丹王大舉伐吐渾党項阻上等部太子倍  
居守堯骨從行七月曷刺等擊素昆那山東  
部族破之八月契丹主至烏孤山以鵝祭天  
遂次古單于國登阿里典壓得斯山以麋鹿  
祭天九月次古回鶻城勒石紀功因拜日於  
蹕林遣騎攻阻卜遂鑿金河水取烏山石輦  
致潢河木葉山以示山川朝海宗嶽之意命  
礮闕曷可汗故碑以契丹突厥漢字紀其功  
是月破胡毋思山諸蕃部次業得思山以赤  
牛青馬祭天地十月次于霸離思山遣兵踰  
流沙拔浮圖城盡取西鄙諸部十一月射虎  
於烏刺邪里山抵霸里山六里餘且行且獵  
日有鮮食  
軍士皆給

### 冬十一月契丹以韋延徽為左僕射

延徽幽州安次人初為盧龍軍節度支使為  
劉守光聘于契丹契丹主怒其不屈留之述  
律后諫曰彼秉節不撓賢者也奈何困辱之  
契丹主乃召與語大悅因命參軍事攻吐渾  
諸部延徽之籌畫居多且請樹城郭分市里  
以處漢人之乞降者又為之配偶教墾藝以  
生養之降民安業逃亡者少居久之慨然懷  
其鄉里賦詩見意遂亡歸唐已而與唐將王  
緘有隙懼及難乃省親幽州匿故人王德明  
家德明問所適延徽曰將復走契丹德明不  
以為然延徽微咲曰彼失我如失左右手其  
見我必喜既至契丹主問故延徽曰忘親非

資治通鑑綱目續編 卷之七 十七

孝棄君非忠臣雖挺身逃臣心在陛下臣所以復來契丹主大喜賜名匣列匣列契丹語復來也即命守政事令中外事悉令參決遂進左僕射

### 契丹蕭阿古只寇唐幽蔚州

契丹連歲擾唐北鄙唐以李嗣源鎮成德禦之

乙酉 唐同光二年 冬十二月契丹主侵渤海

渤海本粟末靺鞨也唐武后時高麗別種大祚榮走保遼東睿宗封為渤海郡王因自稱渤海國併有扶餘肅慎等十餘國有文字禮樂官府制度五京十五府六十二州地方五

千餘里衆數十萬鄰于高麗而與契丹世讐契丹主既攻西鄙諸部九月還西樓謂左右曰世讐未雪豈宜安處乃大舉攻渤海大誣誤述律后太子倍大元帥堯骨皆從閏十二月祠木葉山遂以青牛白馬祭天地于烏山進次商嶺丁巳夜圍扶餘城

丙戌 唐明宗嗣源天成元年 春正月契丹主

滅渤海二月改為東丹國以其子倍為人皇王

居之

正月契丹拔扶餘城欲括城內戶太子倍諫曰今始得地而料民民必不安若乘破竹之

卷之五十五 契丹傳

四。五思仕

勢徑造忽汗城克之必矣契丹主從之遂進兵  
圍忽汗城大譚謨戰敗乞降契丹主受之先  
遣近侍入城索兵仗渤海邏卒害之譚謨復  
叛契丹攻其城入焉譚謨請罪馬前契丹主  
命以兵衛譚謨及族屬出城二月壬辰以青  
牛白馬祭天地大赦改元天顯丙午改渤海  
為東丹國忽汗為天福城冊太子倭為人皇  
王以主之復以弟迭剌為左大相渤海老相  
為右大相渤海司徒大素賢及耶律羽之為  
左右次相而還寘大譚謨於臨潢之西賜名  
曰烏魯古人皇王建元甘露稱制置百官于  
其國一切以漢法為治歲貢布十五萬端馬  
千匹而已

### 夏四月唐使姚坤如契丹

唐莊宗為郭從謙所弑明宗即位遣供奉官  
姚坤告哀於契丹契丹主慟哭曰我朝定兒  
也朝定猶華言朋友也謂坤曰今天子聞洛  
陽有急何不救坤曰地遠不能及曰何故自  
立坤言其由曰漢兒喜飾詐毋多談又曰聞  
吾兒專好聲色遊畋不恤軍民宜其及此我  
自聞之舉家不飲酒散遣伶人解縱鷹犬若  
亦效吾兒所為行自亾矣又曰我於今天子  
無怨足以修好若與我大河之北吾不復南  
侵矣坤曰此非使臣之所得專也契丹主怒  
囚之旬餘復召謂曰河北恐難得得鎮定幽  
州亦可也給紙筆趣令為狀坤不可欲殺之

契丹傳

一七 吉

韓延徽切諫  
乃復囚坤

秋七月契丹主億卒于扶餘其后述律氏治國事

契丹主自渤海還七月甲戌次扶餘城而疾  
辛巳殂年五十五述律后稱制決事人皇王  
倍大元帥堯骨聞計皆還九月至西樓謚曰  
昇天皇帝廟號太祖權殯于子城西北。述  
律后既稱制召諸酋長妻謂曰我今寡居汝  
不可不效我又集其夫泣問曰汝思先帝乎  
對曰受先帝恩豈得不思曰果思之宜往見  
之遂殺之左右有桀黠者后輒謂曰爲我達

語於先帝至墓所則殺之前後所殺以百數  
最後趙思溫當往不肯行后曰汝事先帝嘗  
親近何爲不行對曰親近莫如后后往臣請  
繼之后曰吾非不欲從先帝于地下也顧嗣  
子幼弱國家無主不得往耳乃  
斷一腕令置墓中思溫亦得免

冬十月契丹盧龍節度使盧國用帥其衆還唐

丁酉唐天成二年。契丹冬十一月契丹主德光

立尊其母述律氏爲太后

八月葬太祖於祖陵既葬太祖議嗣位者述  
律后欲舍人皇王倍而立堯骨乃命倍與堯

骨俱乘馬立帳前謂羣臣曰二子吾皆愛之莫知所立汝曹擇可者執其轡衆知后意爭執堯骨轡后曰衆之所欲吾安敢違遂立為天皇王是為嗣聖皇帝請改元不許十二月尊后為應天皇太后國事皆決焉立妃蕭氏為皇后堯骨尋改名曰德光人皇王倍以不得立常怏怏太后知之遣歸東丹

### 契丹城世沒里為祖州

以太祖葬其處及耨里思以下四世所生之地因名曰祖州而興版築焉

**戊**唐天成三年春正月契丹以王郁為興國軍凡五國三鎮

節度使○三月唐義正節度使王都反乞師

契丹夏五月唐招討使王晏球討都及契丹

秃里鐵刺戰於定州大敗之

王都反唐以王晏球為招討使會師討之都以重賂求援于契丹契丹主遣奚秃里鐵刺以萬騎赴之晏球與戰於定州都及鐵刺大敗僵屍蔽野都鐵刺僅以身免盧龍節度使趙德鈞邀其潰卒殆無孑遺既而契丹復遣楊隱涅里衣都統查刺帥衆援鐵刺晏球逆戰復大破之殺鐵刺獲涅里衣查刺等數十人餘衆散投村落村人以白旄擊之其得脫

者不過百人自是契丹沮氣不敢輕用師以犯唐境

### 六月契丹行瑟瑟禮

契丹自遙蓋氏胡刺可汗制祭山儀蘇可汗制瑟瑟儀阻午可汗制柴冊儀再生儀情朴用儉後世遵之瑟瑟儀禱雨之祭也

### 冬十二月契丹以遼陽為南京

命耶律羽之遷東丹民以實之

### 巳凡五國三鎮秋九月契丹主祀木葉山

木葉山在永州西界潢河北界土河始祖首可汗廟居其上故凡有事則必先以白馬青牛告之

### 契丹主行再生禮

契丹之俗凡十二歲其主本命前一年初度之辰行再生儀以祀其先示不敢忘本也

庚唐長興元年凡五國三鎮春三月契丹主以其弟李胡為

### 太弟

李胡述律后之幼子也



三十一 契丹人皇王倍自東丹奔唐唐以為

三十一 三十三 思任

冬十一月契丹人皇王倍自東丹奔唐唐以為

懷化軍節度使賜名曰李贊華

人皇王既失職居于東丹建書樓于西宮作  
樂田園詩唐主聞之遣使浮海持書密召之  
倍因畋於海上唐使又至倍謂左右曰我以  
天下讓主上今反見疑而使晉寧來撫慰我  
我其危哉不如適他國以成秦伯之名遂立  
木海上刻詩曰小山壓大山大山全無力羞  
見故鄉人從此投外國乃載書帥其部曲四  
十人浮海奔唐唐賜姓名曰李贊華以莊宗  
妃夏氏妻之使為懷化  
軍節度使鎮滑州焉

辛卯 唐長興二年 夏四月契丹立中臺省于遼陽

壬辰 唐長興三年 凡五國三鎮

癸巳 唐長興四年 春二月唐定難節度使李仁福

卒子昇超嗣

甲午 唐主從珂 清泰元年 秋九月契丹主寇唐雲武

州

乙未 唐清泰二年 春二月唐定難節度使李昇超

凡六國三鎮

湯文

# 卒弟彞殷嗣

丙晉高祖石敬瑭天福元年。夏五月唐河東申是歲晉代唐凡六國三鎮。

節度使石敬瑭反招討使張敬達討之敬瑭乞

師於契丹秋八月契丹主赴太原九月敬達及

契丹主戰於汾曲敗績走晉安契丹圍之唐主

# 自將救晉安次于懷州

石敬瑭素與唐主不相能在鎮陰為自全之計累表乞解兵柄以當唐主之意唐主移敬

瑭鎮鄆州以張敬達為西北都部署趣敬瑭赴鎮敬瑭疑懼掌書記桑維翰曰明宗遺愛

在人主上以庶孽代之羣臣不附公明宗之愛婿今主上以反逆見待此非首謝可免但

力為自全之計契丹主素與明宗約為兄弟公誠能推心屈節事之朝呼夕至何患不成

敬瑭乃上表言唐主養子不應承祀請傳位許王從益唐主遂削奪敬瑭官爵以張敬達

為太原四面兵馬都部署楊光遠副之敬瑭令桑維翰草表稱臣於契丹主且請以父禮

事之約事捷之日割盧龍一道及鴈門關以北諸州為謝劉知遠諫曰稱臣可矣以父事

之太過厚以金幣賂之自足致其兵不必許以土田恐異日大為中國之患悔之無及敬

塘不從遣趙瑩往柔維翰繼之契丹主得表大喜遣蕭轄里報書期以仲秋傾國赴援張敬達之師至晉陽築長圍以攻之八月契丹主將騎五萬自陽武谷而南九月至晉陽陳於虎北口先遣人謂敬塘曰吾欲今日即破敵可乎敬塘遣人馳報曰南軍甚厚請伺明日使者未至契丹已與唐騎將高行周符彥卿合戰敬塘乃遣劉知遠兵助之張敬達楊光遠以步兵陣於城西北山下契丹遣輕卒三千騎不披甲直犯其陣唐兵逐之至汾曲契丹伏兵起衝唐兵斷而為二縱兵乘之敬達等大敗死者近萬人敬達等收餘衆走保晉安契丹亦引兵歸虎北口是夕敬塘率其僚屬出見契丹主問曰皇帝遠來士馬疲倦

遽與唐戰而大勝何也契丹主曰始吾謂必斷雁門諸路伏兵險要則吾不可得進矣使人偵伺皆無之吾是以長驅深入知大事必濟也兵既相接我氣方銳若不乘此急擊之曠日持久則勝負未可知矣此吾所以亟戰而勝不可以勞逸常理論也敬塘歎伏引兵會圍晉安寨置營于晉安之南長百餘里厚五十里多設鈴索吠犬人哇步不能過敬達等士卒猶五萬人馬萬匹四顧無所之遣使者告敗唐主大懼遣符彥饒將兵屯河陽詔天雄范延光屯遼州盧龍趙德鈞由上黨趨團柏谷與其子趙延壽合勢進擊耀州潘環亦出兵會戰而下詔親征遂發洛陽唐主心悼北行至河陽宰相盧文紀希旨言國家


根本在河南胡兵倏來忽往不能久留晉安  
大寨甚固况已發三道兵救之河陽天下津  
要車駕宜留此鎮撫南北且使近臣往督戰  
苟不能解圍進亦未晚唐主從之乃遣樞密  
使趙廷壽將兵二萬如潞州唐主次于懷  
州以晉安為憂日夕酣飲悲歌群臣或勸其  
北行則曰卿勿言石郎使我心膽墮地然精騎猶三萬也

# 冬十一月唐行營都統趙德鈞降于契丹契丹

## 不受

盧龍節度使趙德鈞陰蓄異志欲因亂取中原乃請將騎由土門西入以解晉安之圍唐

王許之以德鈞為諸道行營都統德鈞合  
鎮澤潞之兵而進與其子廷壽遇於西陽遂  
併兵北屯團柏谷口欲倚契丹以成已志乃  
密以金帛賂契丹王云若立已為帝請即以  
見兵南平洛陽與契丹約為兄弟仍許石氏  
常鎮河東契丹主自以深入敵境晉安未下  
德鈞兵尚強又以范延光在其東且恐山北  
諸州邀其歸路欲許德鈞之請然已許立石  
敬瑭敬瑭聞之大懼亟使桑維翰說契丹主  
曰趙北平父子素蓄異志非以效狗國之人  
何足可畏而信其誕妄之辭貪其毫末之利  
棄垂成之功乎且使敬瑭得天下將竭中國  
之財以奉大國豈此小利之比乎契丹主曰  
吾非有渝前約也但兵家權謀不得不爾維



翰曰皇帝以信義救人之急四海之人俱屬耳目奈何一旦二三其命使大義不終臣竊為皇帝不取也跪于帳前自旦至暮涕泣爭之契丹乃指帳前石謂德鈞使者曰我已許石此石爛可改也

### 契丹主立石敬瑭為晉皇帝

十月甲子契丹主封石敬瑭為晉王幸其府丁卯契丹主召敬瑭至帳中命之坐從容曰吾三千里來赴難一戰而勝殆天意也觀汝器貌識量真中原之主吾欲立汝為天子敬瑭辭讓不許契丹主令有司設壇晉陽備禮策命十一月丁酉策敬瑭為大晉皇帝親

解衣冠授之

### 閏月唐楊光遠殺招討使張敬達以眾降于契

### 丹

晉安被圍八十餘日唐高行周符彥卿等數敗內外隔絕芻糧俱盡至濯馬糞屑木以飼馬馬飢至自相啖其鬃尾死則以充食楊光遠等勸敬達出降敬達曰吾受明宗及今上厚恩為元帥而軍敗其罪已大况降敵乎今援兵旦暮且至當伺之若必力盡勢窮諸君斬我出降未為晚也閏月甲子諸將旦集光遠斬敬達首帥諸將降於契丹契丹主嘉其

忠謂左右曰凡為人臣當如此也命以禮葬而祭之焉

契丹主以晉主敬瑭南下唐師潰於團柏唐主

還河陽趙德鈞降於契丹

契丹主與晉主南下命晉主兄子重貴守太原以契丹將高模翰為前鋒至團柏唐趙德鈞趙延壽先遁諸將繼之士卒大潰死者萬計唐主聞晉主已立楊光遠等復降用李崧策引眾南還至河陽命諸將分守南北城契丹主至潞州趙德鈞延壽及判官張礪迎謁於高河契丹鎖德鈞延壽送歸國德鈞見述律太后后問曰汝近者何為往太原德鈞曰

奉唐主之命后指天曰汝從吾兒求為天子何妄語耶又自指其心曰此不可欺也又曰吾兒將行吾戒之曰趙大王若引兵北向渝關亟須引歸太原不可救也汝欲為天子何不先擊退吾兒徐圖亦未晚汝為人臣既負其主不能擊敵又欲乘亂邀利所為如此何面目復求生乎德鈞俛首不能對踰年而死

契丹主次於潞州晉主敬瑭以契丹師南下

契丹主次於潞州其臣勸還國契丹主乃遣晉主趨洛舉酒屬之曰我若南向河南之人必大驚駭汝宜自引漢兵南下我令廸離畢將五千騎送汝至河梁臨別謂晉主曰我且

留此伺汝音問有急則下山救汝若洛陽既定吾即北反矣因泣曰世世子孫勿相忘又曰劉知遠趙瑩桑維翰皆創業功臣無大故勿棄也

### 唐主還洛陽

符彥饒張彥琪言於唐主從珂曰今胡兵大下河水復淺人心已離此不可守唐主命河陽節度使萇從簡守河陽南城遂斷浮梁歸洛晉主至河陽從簡具舟楫迎降之

### 唐主殺李贊華

唐主至洛知事窮蹙召李贊華同歿贊華不從唐主遣李彥紳就其第殺之

### 唐主自焚歿晉主敬瑭入洛陽追廢唐主為厲

人

唐主議復向河陽將校皆已飛狀迎晉主矣晉主慮唐主西奔遣契丹千騎扼澗池唐主與曹太后劉皇后雍王重美及宋審虔等攜傳國寶登玄武樓自焚皇后欲燒宮室重美諫曰新天子至必不露居他日重勞民力死而遺怨將安用之乃止王淑妃與許王從益匿於毬場獲免是日晚晉主入洛陽唐兵皆解甲待罪晉主命劉知遠部署京城知遠命漢軍還營館契丹軍于天宮寺上蕭然無敢犯令十二月晉主追廢唐主

十二月契丹主自潞州北歸

契丹主命收其士卒戰沒者瘞之汾水上以爲京觀桑維翰爲文紀之十二月辛卯聞晉主入洛遣郎君解里德撫問遂帥衆北歸明年正月至臨潢

丁酉天福二年夏六月晉使聶延祚請上尊號

於契丹契丹主不許○高麗侵新羅百濟降之

於是東夷諸國皆附高麗有二京六府九節度百二十郡云

戊戌契丹會同元年○契丹冊晉主爲英武

明義皇帝

五月晉復遣使請上尊號于契丹契丹主許之七月契丹主使其中臺省右相耶律迭蘭迭烈哥使晉冊晉主爲英武明義皇帝

冬十一月晉主使馮道上尊號于契丹契丹太

赦改元

九月晉主遣守司空馮道左散騎常侍韋勳上契丹述律太后尊號曰廣德至仁昭烈崇簡應天皇太后左僕射劉煦右謀議大夫盧重上契丹主尊號曰睿文神武法天啟運明德



章信至道廣敬昭孝嗣聖皇帝十一月契丹主御宣政殿受之因大赦始改元會同晉主事契丹甚謹奉表稱臣謂契丹主為父皇帝每契丹使至即於別殿拜受命敕歲輸金帛三十萬之外吉凶慶弔歲時贈遺相繼於道乃至太后元帥太子諸王大臣皆有賂遺小不如意輒加責讓多不遜語朝野咸以為耻而晉主事之曾無倦意其後契丹主屢止晉主上表稱臣但令為書稱兒皇帝如家人之禮云

晉使趙瑩歸幽薊瀛莫涿檀順媯儒新武雲應朔寰蔚十六州于契丹

契丹主改新州為奉聖州武州為歸化州

契丹以臨潢為上京幽州為南京遼陽為東京

契丹主既得晉賂十六州之地乃更以皇都為上京臨潢府升幽州為南京析津府更南京遼陽府為東京契丹之制居有宮衛謂之幹魯朶出有行營謂之捺鉢分鎮邊圉謂之部族有事則以攻戰為務閒暇則以畋漁為生其地盡有大漠侵包長城之境故秋冬違寒春夏避暑隨水草就弋獵春捺鉢曰鴨子河灤在長春州夏捺鉢無常所而吐兒山為多在慶州秋捺鉢曰伏虎林在永州冬捺鉢曰廣平淀在永州蓋其俗重鵝每獲鵝必祭

天故捺鉢多澤  
河灤之地焉

### 契丹始定官名

多易其俗  
以漢官

### 契丹以趙延壽為南京畱守

總山  
南事

**巳** 晉天福四年秋八月晉初歸幣於契丹

凡六國三鎮  
帛三十萬匹  
歲以為常

**庚** 晉天福五年春三月契丹主如幽州

凡六國三鎮  
契丹如南京至燕備法駕入自拱宸門御  
元和殿行入閣禮晉遣楊端問起居六月還

臨  
漢

**辛** 晉天福六年春二月晉使楊彥詢如契丹契丹

### 執之

晉成德節度使安重榮耻臣契丹見其使者  
必箕踞慢罵或潛遣人殺之契丹以為讓晉  
主遣楊彥詢往遜謝且言重  
榮跋扈狀契丹畱之不遣

# 晉成德節度使安重榮執契丹行人拽刺

重榮執契丹使拽刺掠幽州南境復遣使誘吐谷渾夷離董蘇等叛契丹而附晉上表于晉主言吐谷渾兩突厥契苾沙陀各帥部眾歸附黨項等亦納契丹告牒稱為虜所凌暴願自備十萬眾與晉共擊契丹陛下屢敕臣承奉契丹勿自起釁端其如天道人心難以違拒願早決計表數千言大抵斥晉主父事契丹竭中國以媚無厭之虜又為書遺朝貴及遺藩鎮云已勒兵必與契丹決戰晉主患之乃以劉知遠為北京留守而自如鄴都以詔喻安重榮曰吾因契丹得天下爾因吾致富貴吾不敢忘德爾乃忘之邪今吾以天下臣之爾欲以一鎮抗之不亦難乎宜深思之無取後悔重榮得詔愈驕

# 冬十月晉安重榮反伏誅十二月契丹歸楊彥

## 詢於晉

重榮聞晉主在鄴遂與山南東道節度使安從進發兵反晉主以杜重威為招討使討之重榮敗斬其首函之以獻於契丹契丹乃歸楊彥詢於晉

**壬寅** 晉主重貴天福七年夏六月晉主敬瑭殂兄子

## 重貴立

重榮之將反也誘吐谷渾酋長白承復等  
叛契丹及劉知遠為北京留守以重賂招承  
福降之遷其衆于嵐石之間而收其精騎重  
榮既敗契丹遣使讓晉以招納叛降晉主憂  
悒成疾而歿馮道與馬步都虞候景延廣議  
舍晉主子重睿而奉敬瑭兄儒之子重貴即  
位遣使告于契丹

### 秋七月晉使梁言如契丹

契丹遣使弔祭于晉晉主遣金吾衛大將軍  
梁言判四方館事朱崇節往謝大臣議奉表  
稍臣景延廣請致書稱孫李崧曰陛下如此  
他日必躬擐甲胄與契丹戰於時悔無益矣

延廣固爭馮道依違於其間晉主卒從延廣議

### 八月晉執契丹行人喬榮既而歸之

晉梁言至契丹契丹主怒其不稱臣遣客省  
使喬榮讓之景延廣因說晉主囚榮於獄大  
臣皆言契丹不可負乃釋榮慰賜而歸之榮  
辭延廣延廣大言曰歸語而主先帝為北朝  
所立故稱臣奉表今上乃中國所立所以降  
志於北朝者正以不敢忘先帝盟約故耳為  
鄰稱孫足矣無稱臣之理翁怒則來戰孫有  
十萬橫磨劍足以相待他日為孫所敗取笑  
天下毋悔也榮欲為異時據驗乃曰公所言  
頗多懼有遺忘願記之紙墨延廣命吏書其

語以授之。柴還且以白契丹主。契丹主大怒。政事令趙延壽謀欲代晉帝。中國因力勸南伐契丹主。然之。自是晉使如契丹者皆繫之。侍中桑維翰屢請遜辭以謝契丹。每為延廣所沮。晉主以延廣有定策功。寵冠羣臣。文總宿衛兵。故大臣莫能與之爭。劉知遠鎮河東。知延廣必致寇而不敢言。但益募兵以備契丹。

癸卯 晉天福八年 春二月 晉主如大梁 凡七國三鎮

晉主聞契丹將南伐。乃還東京。然猶問遺不絕。

### 冬十二月契丹趙延壽帥師伐晉

晉平盧節度楊光遠有憾於晉主。遣人密告於契丹曰。晉飢若伐之一舉可克也。趙延壽復勸之。契丹主如南京。命趙延壽趙延昭安端解里等帥眾五萬由滄恒易定分道伐晉。謂延壽曰。若得晉當立汝為帝。延壽深信之。為之盡力。契丹主自將繼進。

甲辰 晉開運元年 春二月 契丹主伐晉 晉主禦之 凡六國三鎮

三月 契丹師還 夏四月 晉主還大梁 賊景延廣

### 為西京留守

正月 趙延壽延昭次任 立安端入鴈門 圍忻代 延壽既入 貝州 契丹主授延壽魏博等州

節度使封魏王帥所部屯南樂晉以高行周  
為都部署將兵禦之且遣使請修舊好契丹  
主復書曰已成之勢不可改也若必欲如故  
宜割河北諸州及遣桑維翰景延廣來議之  
於是晉主自將以景延廣為御營使遂發大  
梁時用兵方略號令皆出延廣延廣乘勢使  
氣陵侮諸將雖天子亦不能制契丹主次於  
元城晉主次於澶州二月契丹攻博州降之  
楊光遠密道契丹之師自馬家口濟河晉降  
將周儒引契丹將麻荅營於河東攻鄆州北  
津以應楊光遠晉遣李守貞皇甫遇梁漢璋  
薛懷讓將兵萬人緣河水陸俱進至馬家口  
麻荅戰敗死者萬餘遂西退二月趙延壽延  
昭率騎數萬攻高行周於戚城契丹主繼之  
分左右翼以進行周與戰自午至晡互有  
勝負契丹主復以勁騎突晉中軍晉主出陣待  
之契丹主望見晉師之盛謂左右曰楊光遠  
言晉軍半已餒死今何多也以精騎左右略  
陣晉師不動萬弩齊發飛矢蔽天契丹稍却  
兩軍死者不可勝計至暮契丹主以人馬飢  
疲所向無功乃引還契丹帳中小校忘入晉  
師言契丹已傳木契丹收軍北去延廣疑有  
詐閉壁不敢追契丹所過焚掠民物殆盡四  
月晉主還大梁延廣既為上下所惡晉主亦  
憚之桑維翰疏其罪出為西京留守  
延廣鬱鬱不得志日夜縱酒而已

秋七月晉使張暉奉表乞和于契丹契丹執之

晉書 卷一百一十五 晉書 卷一百一十五

自是晉使遂絕

### 晉以桑維翰為中書令兼樞密使

或謂晉主曰陛下欲禦北狄安天下非桑維翰不可乃罷馮道而用維翰事無大小悉以委之維翰既相一制指揮節度使十五人會兵以備契丹無敢違者時人服其膽略

### 冬十二月契丹主伐晉

十一月契丹主徵諸部兵會於溫榆河北十二月伐晉趙延壽引兵先進契丹主以大軍繼之圍恒州下九縣遂建牙於元氏晉遣張從恩馬全節安審琦趙在禮屯鄴都以備之

俾契丹之盛不敢往晉主詔從恩稍却於是衆皆恟懼無復部伍委棄器甲所過焚掠比至相州不能復整尋詔在禮還屯澶州全節還鄴都景延廣守胡梁渡張彥澤屯黎陽

### 晉以折從遠為府州團練使

初晉割地賂契丹府州與焉會契丹欲盡徙河西之民以實遼東州人大恐刺史折從遠雲中大族也因保險拒之及晉與契丹絕從遠引兵深入其境拔滕州及十餘寨故命之

乙巳 晉開運二年春三月晉及契丹戰于白團衛

### 村契丹主敗走晉王還大梁

正月契丹分兵攻邢洛磁州殺掠殆盡入鄴  
都境張從恩馬全節安審琦悉兵陣於相州  
安陽水之南皇甫遇與慕容彥超將千騎前  
覘契丹至鄴都遇契丹數萬遇等且戰且却  
至榆林店契丹大至二將謀曰吾屬今走死  
無遺矣乃止布陣自午至未力戰百餘合相  
殺傷甚衆遇馬斃步戰其僕杜知敏以所乘  
馬授之戰稍却顧知敏已爲契丹所擒遇曰  
知敏義不可棄也與彥超躍馬入陣取知敏  
而還俄而契丹繼至二將曰吾屬勢不可走  
以死報國耳日且暮安陽諸將怪覘兵不還  
審琦引騎兵出將救之從恩曰虜衆猥至盡  
吾軍恐未足以當之公往何益審琦曰成敗  
天也萬一不濟當共受之借使虜不南來坐

失皇甫大師吾屬何顏以見天子遂踰水而  
進契丹解去遇等乃得還契丹亦引軍退其  
衆自相驚曰晉軍悉至矣時契丹主在邯鄲  
聞之卽時北還不再宿至鼓城從恩等議曰  
契丹傾國而來吾兵少糧盡死無日矣不若  
引軍就黎陽倉南倚大河以拒之可萬全議  
未決從恩引兵先發諸軍繼之擾亂失亾不  
可勝計畱步兵五百守安陽橋夜四鼓知相  
州事符彥倫曰比夕紛紜人無固志五百契  
卒安能守橋卽啓入乘城爲備至曙望之契  
丹數萬騎已陳安陽水北彥倫命城上揚旗  
鼓譟約束契丹不測踰水環州而南聞張彥  
澤兵至乃引北還馬全節不敢追既而全節  
等言虜衆不多宜乘其散歸種落大舉徑襲




幽州晉王以為然徵兵諸道下詔親征遂發  
 大梁行至澶州全節等諸軍以次北上劉知  
 遠聞之曰中國疲弊自守恐不足乃橫挑疆  
 胡勝之猶有後患况不勝乎三月杜威等諸  
 軍會于定州攻契丹泰州降之取蒲城獲契  
 丹二千人取遂城趙延壽曲有降者言契丹  
 主還至虎北口聞晉取泰州復擁眾南向約  
 八萬餘騎計來日入夕當至杜威等懼退師  
 至陽城契丹大至晉師與戰逐北十餘里契  
 丹踰白溝而去晉軍結陣而南胡騎四合如  
 山諸軍力戰拒之人馬飢乏至白團衛村埋  
 鹿角為行寨契丹圍之數重奇兵出寨後絕  
 糧道是夕東北風大起營中掘井輒崩人馬  
 俱渴至曙風甚契丹主坐奚車中命鐵鷄軍

四面下馬拔鹿角而入奮短兵以擊晉軍又  
 順風縱火揚塵以助其勢軍士皆憤怒大呼  
 曰都招討使何不用兵令士卒徒歿諸將請  
 出戰杜威曰伺風稍緩徐觀可否李存貞曰  
 彼眾我寡風沙之內莫測多少惟力鬪者勝  
 此風乃助我也若伺風止吾屬無類矣即呼  
 曰諸軍齊擊賊又謂威曰令公善守禦守貞  
 以中軍決歿矣馬軍排陣使張彥澤召諸將  
 問計皆曰虜得風勢宜候風回與戰彥澤亦  
 以為然右廂副使藥元福謂彥澤曰令軍中  
 飢渴已甚若伺風回吾屬已為虜矣敵謂我  
 不能逆風以戰宜出其不意急擊之此兵之  
 詭道也都排陣使符彥卿曰與其束手就擒  
 曷若以身徇國乃與元福彥澤及皇甫遇引

精騎出西門擊之諸將繼至契丹却數百步風勢益甚昏晦如夜彥卿等擁萬餘騎橫擊契丹呼聲動天地契丹大敗而走勢如崩山守貞亦令步兵盡拔鹿角出聞步騎俱進逐北二十餘里鐵鷁軍既下馬蒼黃不能復上委棄馬仗蔽地契丹主乘奚車走十餘里追兵急獲一橐駝乘之而去諸將請急追之杜成揚言曰逢賊幸不歿更索衣囊耶守貞曰人馬渴甚得水足重難以追寇乃退得定州四月契丹主至幽州散兵稍集以失利杖其諸將戰不力者各數百晉諸軍引歸晉主還大梁

秋七月晉使孟守中奉表乞和于契丹

桑維翰屢勸晉主復和親契丹以紆國患晉主從之乃遣孟守中奉表稱臣請契丹謝過時契丹連歲伐晉人畜多死國中怨之述律太后謂契丹主曰彼漢人為胡主可乎曰不可后曰然則汝何故欲為漢主契丹主曰石氏負恩不可容后曰汝今雖得漢地不能居也萬一蹉跌悔何所及又謂其群下曰漢兒何得一向眠自古但聞漢和蕃不聞蕃和漢漢兒果能回意我亦何惜與和及晉使至契丹主曰使素延廣自來仍割鎮定兩道隸我則可不然不能也晉君臣以契丹語忿無和意乃止及契丹後入大梁謂李崧等曰向使晉使再來則南北不復戰矣



通鑑綱目續編 卷之三十三 晉書 三百年

冬十二月晉柔維翰罷○高麗王王建卒子武立

高麗自唐末中原多故始自立高氏為王唐長興中王建承高氏之位權知國事唐封建為高麗國王朝貢不替至是建卒子武嗣為國王

丙午凡五國三鎮契丹主伐晉圍恒州

冬十月晉使都招討使杜威會師擊契丹十二

### 月威叛以衆降於契丹

先是有自幽州來者言趙延壽有歸晉意樞密使李崧宰相馮玉信之命天雄節度使杜威致書延壽啖以厚利延壽復書乞發大軍應接辭旨懇密李崧等欣然復遣人詣延壽與為期約於是契丹使其瀛州刺史劉延祚遣樂壽監軍王繼書請舉城內附云城中契丹不滿千人乞朝廷發輕騎來襲已為內應契丹主已歸牙帳地遠阻水不能救也繼與杜威因屢奏瀛莫乘此可取馮玉李崧信以為然欲發大兵迎趙延壽及劉延祚遂請于晉主以杜威為都招討使李守貞副之中書令趙瑩謂李崧馮玉曰杜令公國之貴戚位兼

晉書 卷之三十三 晉書 三百年

將相而所欲未厭心常慊慊豈可復假以兵  
權必欲有事於北方不若止任守貞為愈也  
不從十月晉主下敕勝曰專發大軍往平黠  
虜先取瀛莫安定關南次復幽燕盪平塞北  
有能擒獲虜主者除上鎮節度使賞錢萬緡  
縮萬匹銀萬兩時積雨半載軍行及饋運者  
甚艱苦杜威李守貞會兵於廣晉禁軍皆從  
宿衛空虛十一月至瀛州城門洞啓寂若無  
人威等不敢進契丹主在恒州聞之遣精兵  
斷河橋杜威等退保武強契丹遣南院大王  
迪輦將軍高模翰分兵由瀛州間道以進杜  
威遣貝州節度使梁漢璋帥眾二千拒之與  
模翰戰敗歿杜威乃以張彥澤為前鋒引兵  
據中渡橋趙廷壽高彥溫以步騎前後乘之

指揮使王清言於杜威曰請以步卒為前  
奪橋開道公帥諸軍繼之得入鎮州則無憂  
矣威乃遣清與宋彥筠同進清戰甚銳契丹  
小却諸將請以大軍繼之杜威不從彥筠戰  
敗遂走王清獨帥麾下力戰屢請救兵威不  
許清謂其眾曰上將握兵坐觀吾輩困急而  
不救此必有異志吾輩當以死報國耳眾感  
其言莫有退者至暮戰不息契丹以新兵繼  
之清及士眾盡歿諸軍皆奪氣杜威等遂與  
契丹夾清沁而軍築壘為持久之計威性懦  
怯偏裨皆節鎮但日相承迎置酒作樂罕議  
軍事契丹以大兵當晉軍之前潛遣蕭翰將  
百騎出晉軍之後斷晉糧道及歸路樵采者  
遇之盡為所掠有逸歸者皆稱虜眾之盛軍

中恟懼，翰獲晉民，皆黥面曰：「奉敕不殺縱之。」南走，運夫在道，遇之皆棄車驚潰。杜威請益兵，詔悉發守宮禁者，得數百人赴之。威又遣使告急，還為契丹所獲。自是朝廷與軍前聲問兩不相通。開封尹桑維翰以國家危在旦夕，求見言事。晉主方在苑中調鷹，辭不見。又詣執政，言之執政不以為然。退謂所親曰：「晉氏不血食矣。」晉主欲自將北征，宣徽使李彥韜諫止之，乃詔高行周、符彥卿共戍澶州。景延廣戍河陽，契丹遙以兵環晉營，軍中食盡。杜威與李守貞、宋彥筠謀降契丹，乃先遣詣契丹主牙帳，邀求重賞。契丹主給之曰：「趙廷壽威望素淺，恐不能帝中國。汝果降者，當以汝為之。」威喜，遂定降計。伏甲召諸將出降表。

使署名，諸將駭愕，聽命。命軍士出陣于外，盡皆踊躍以為且戰。威親論之曰：「今食盡途窮，當為汝曹共求生計。」因命釋甲，軍士皆慟哭，聲振原野。威守貞仍於眾中揚言：「主上失德，信任奸邪，猜忌於已，聞者莫不切齒。十二月丙寅，契丹主遣趙廷壽衣赭袍至晉營，慰撫士卒，亦以赭袍衣杜威，皆實戲之耳。契丹主擁騎數萬，臨大阜立馬，受杜威等降。閱其眾凡二十萬，授杜威守太傅，鄴都留守李守貞天平節度使，餘各領舊職。分降卒之半付杜威，半隸趙廷壽。復以晉降將孫方簡為義武節度使，麻答為安國節度使。契丹翰林學士承旨張礪言於契丹主曰：「今契丹始得中國，宜以中國人治之，不宜用國人及左右近。」

習苟政令乖失則人心不服  
雖或得之猶將失之不聽

契丹主南下使晉降將張彥澤入大梁晉主重

貴降彥澤幽晉主殺桑維翰

契丹主引兵南下杜威等將降兵以從契丹  
主遣晉都排陣使張彥澤及其御史大夫耶  
律解里監軍傅柱兒將騎二千持詔先赴大  
梁諭晉主降彥澤倍道疾驅夜渡白馬津晉  
主召李崧馮玉李彥韜入禁中計事欲召劉  
知遠入援明日彥澤自封丘門斬關而入城  
中大擾晉主於宮中起火自攜劔驅後宮赴  
火爲親軍將薛超所持俄而彥澤傳契丹主


與李太后書慰撫之且召桑維翰景延廣晉  
主乃命滅火與后妃聚泣召范質草降表自  
稱孫男臣重貴禍至神惑運盡天亾今與太  
后及妻馮氏舉族面縛待罪乃遣廷照廷寶  
奉國寶出迎太后亦上表稱新婦李氏妾傅  
柱兒入宣契丹主命晉主脫黃袍服素衫拜  
受左右皆掩泣使召張彥澤欲與計事彥澤  
微笑不應或勸桑維翰逃去維翰曰吾大臣  
逃將安之坐而伺命彥澤以晉主命召維翰  
維翰至天街遇李崧駐馬語未畢有軍吏於  
馬前揖維翰赴侍衛司維翰知不免顧謂崧  
曰侍中當國今日國亾反令維翰死之何也  
崧有愧色維翰至彥澤以兵守之彥澤縱兵  
大掠二日都城爲之一空彥澤自謂有功於

契丹旗幟皆題赤心為主見者笑之彥澤遷  
 晉主於開封府頃刻不得留見者流涕晉主  
 悉以內庫金珠自隨彥澤曰此物不可匿也  
 晉主悉歸之亦分以遺彥澤彥澤遣指揮使  
 李筠以兵守晉主內外不通上契丹主表章  
 皆先示彥澤然後敢發使取內庫帛主者不  
 與曰此非帝物也求酒於李崧崧亦辭不進  
 又欲見李筠彥澤亦不往馮玉佞彥澤求自送  
 傳國寶冀契丹復任用延煦之母有美色彥  
 澤使人取之彥澤殺桑維翰以帶加頸白契  
 丹主云其自經契丹主命厚撫其家壬午契  
 丹主次赤岡賜晉主詔曰孫勿憂必使汝有  
 噉飯之所又以所獻傳國寶非真詰之晉主  
 奏頃主從珂自焚舊國寶不知所在此寶先

帝所為群臣備知乃止有司欲使晉主銜璧  
 牽羊大臣輿襯迎於郊外契丹主曰吾遣奇  
 兵取大梁非受降也不許又詔晉文武羣僚  
 一切如故朝廷制度金用漢禮改館晉主於  
 封禪寺

契丹執晉景延以歸延廣自殺

契丹主遣將軍康祥以兵趣河陽捕景延廣  
 執之契丹主以牙籌數其八罪且詰之曰致  
 兩主失歡皆汝所為十萬橫磨劍安在延廣  
 不服契丹主召喬榮使相辨證因以紙所記  
 語示之延廣伏地請死契丹主命鎖  
 之先送歸國夜宿陳橋延廣扼吭死



丁漢高祖劉知遠天福十二年。道大同元年。未九月世宗阮天祿元年。是歲晉亡。漢代契丹改國號遼。春正月丁亥朔契丹主德光入大凡五國三鎮。

### 梁行朝賀禮

正月丁亥朔晉百官遙辭晉主於城北乃易素服紗帽迎契丹主於封丘門外伏路請罪契丹主不忍臨視撫慰遣之遂備法駕入大梁民皆驚走契丹主遣使諭之曰我亦人也汝曹勿懼會當使汝曹蘇息我無心南來漢兵引我至此耳至明德門下馬拜而後入遂御崇元殿受賀日暮復出屯于赤岡云

### 契丹誅張彥澤

晉閣門使高勳訴張彥澤以私憾殺其家人契丹主亦怒彥澤擅徙晉主于開封府署殺桑維翰剽掠大梁遂與傅柱兒俱斬於北市仍命高勳監刑彥澤前所殺士大夫子孫皆經杖號哭詬罵以杖朴之勳命剖其心以祭死者市人爭破腦取髓鬻其肉而食之

### 契丹降封晉主重貴為負義侯遷之黃龍府

契丹主使人至封禪寺存問晉主及太后甚至時雨雪連旬外無供億上下凍餒太后使其衛者謂寺僧曰吾嘗於此飯僧數萬今日獨無一人相念取僧辭以虜意難測不敢獻




食晉主陰祈守者乃稍得食幸邠降封晉主重貴為崇祿大夫檢校太尉負義侯遣太子太保趙瑩太子少保馮玉及李彥韜將騎三百送晉主及李太后安太妃馮皇后高祖子重睿晉主子延煦延寶等于黃龍府安置在途供饋不繼或時絕食舊臣無敢進謁者獨磁州刺史李穀迎謁於路傾貲以獻晉主至中渡橋見杜威故寨歎曰天乎我家何負為此賊所破慟哭而去既出塞契丹無復供給至祁州令拜契丹太祖之墓晉主不勝屈辱泣曰薛超誤我馮后求毒藥欲與晉主俱自殺不果黃龍府渤海扶餘城也初契丹太祖滅渤海還次其地得疾見黃龍繚繞可長一里光耀奪目入于行帳是日太祖殂故云

契丹以張礪為平章事李崧為樞密使

守太傅劉煦守太保

契丹引兵入汴京諸門皆以契丹兵守衛磔犬懸羊皮為厭勝謂晉羣臣曰自今不修甲兵不市戰馬輕賦省役天下太平矣改服中國衣冠百官皆如舊制以張礪為平章事礪與趙廷壽共薦晉樞密使李崧會馮道自鄧州來朝契丹主素重二人乃以崧為太子太師充樞密使道守太傅於樞密院伺候又以晉故相劉煦守太保和凝為翰林學士

晉諸藩鎮皆降於契丹



契丹通鑑綱目卷之八十一 四十一 三十九

契丹主遣使以詔賜晉之藩鎮諸鎮爭上表稱臣惟彰義節度使史匡威據涇州以拒契丹而雄武節度使何重建以秦階成降蜀

### 契丹縱兵大掠遣使括借士民錢帛

契丹廣受四方貢獻縱酒作樂趙延壽請給上國兵食契丹曰吾國無此法乃縱胡騎四出剽掠謂之打草穀丁壯斃於鋒刃老弱委於溝壑自東西兩畿及鄭滑曹濮數百里間財畜殆盡契丹主謂判三司劉煦曰契丹兵應有優賜速宜營辦時府庫空竭劉煦請括借都城士民錢帛又分遣使者數十人詣諸州括借皆逼以嚴誅人不聊生其實無所頒給皆蓄之內庫欲輦歸其國由是內外怨憤始患苦契丹皆思逐之矣

### 晉河東節度使北平王劉知遠遣使奉表于契丹

晉主與契丹結怨知遠有步騎五萬坐視不救及聞晉亡乃分兵守四境遣客將王峻奉表稱臣于契丹主契丹主賜詔褒美親加兒字於知遠姓名之上仍賜以木枊胡法以優禮大臣如漢賜几杖之比既而知遠觀望使謂之曰汝不事南朝又不事北朝意欲何所伺耶孔日官郭威言于知遠曰虜恨深矣主峻言契丹貪殘失人心必不能久有中國或

資治通鑑綱目卷之八十一 契丹通鑑綱目卷之八十一 契丹通鑑綱目卷之八十一

勸知遠舉兵進取知遠曰用兵當隨時制宜今契丹新據京邑未有他變豈可輕動且觀其所利止於財貨財貨既足必將北去况冰雪已消勢難久留宜待其去然後取之可以萬全耳

唐遣使如契丹乞修復諸陵契丹主不許

南唐主璟遣使賀契丹滅晉且請詣長安修復諸陵契丹不許

二月契丹主德光御崇元殿行入閣禮建國號曰遼大赦改元以恒州為中京命趙延壽為大

### 丞相中京留守

契丹主召晉百官問曰中國之俗異於吾國吾欲擇一人君之如何皆曰夷夏之心皆願推戴皇帝二月丁巳朔契丹主服通天冠絳紗袍登正殿設樂縣儀衛於庭百官朝賀建國號大遼大赦改元大同禮畢服赭袍坐崇元殿百官行入閣禮以恒州為中京大同府趙延壽以契丹主負約心常怏怏因李崧言於契丹主乞為皇太子契丹主曰吾於魏王雖割肌肉亦不愛但皇太子當以天子兒為之豈魏王所可為也乃命為大丞相樞密使中京留守而以張礪和凝平章事

通鑑綱目卷之... 唐昭宗... 四九 三五

遼封唐郇公李從益為許王

從益與其母王淑妃自洛會朝於汴契丹主拜淑妃曰吾嫂也因封從益為許王復居洛

晉劉知遠稱皇帝於晉陽○遼以耿崇美為昭

義節度使高唐英為昭德節度使崔廷勳為河

陽節度使

分據晉要地也

三月遼以蕭翰為武軍節度使

初晉置天威軍教習歲餘竟不可用悉罷之而無賴子弟不復肯復農業山林之盜自是而繁及契丹入汴縱胡騎打草穀又多以其子弟及親信為節度刺史不通政事華人之狡猾者多往依其麾下教之妄作民不堪命於是所在相聚為盜多者數萬人少者不減千百濫陽賊帥梁暉偵知高唐英未至夜遣壯士踰相州城啓關納眾殺契丹數百據相州自稱昭德留後陝州將趙暉晉州將藥可儔潞州將高防皆殺其節度使及契丹使者奉表降於劉知遠澶州賊帥王瓊帥其徒圍節度使耶律郎五於牙城遼主聞之懼謂左右曰我不知中國之人難制如此乃即遣泰寧安審琦武寧符彥卿等歸鎮謂晉百官曰

通鑑綱目續編

子

天時向曙吾難久留欲暫至上國省太后乃以汴州為宣武軍授述律太后兄子小漢為節度使

### 夏四月遼主北歸

遼主以晉主劉知遠既立州鎮多附因圖北還乃先遣晉諸司僚吏嬪御宦寺方技百工圖籍歷象石經銅人明堂刻漏太常樂譜諸宮縣鹵簿法物及鎧仗悉送上京寧武都虞候武行德部送之遼主謂宣徽使高勳曰吾在上國以射獵為樂至此令人悒悒今得歸死無恨矣四月丙辰朔發自汴州馮道李崧和凝李濟徐台符張礪等皆從遂攻梁暉於

相州克之悉殺城中男子驅其婦女而北留高唐英守之遺民僅七百人而髑髏十餘萬武行德行至河陰與將士謀曰虜勢不能久留中國不若共逐其黨堅守河陽以俟天命之所歸者而臣之眾以為然即相與殺契丹監軍使會崔廷勳以兵送耿崇美之潞州行德遂乘虛入據河陽遣弟行友奉蠟表詣太原晉主知遠以行德為河陽節度使契丹主之初入汴也請降者七十六州得戶百九萬百一十八未幾多叛還濟黎陽渡顧謂左右曰我此行有三失宜天下之叛我也縱兵打草穀一失也括民私財二失也不遽遣諸節度還鎮三失也


遼主德光卒于藥城兄子兀欲立于寧夏名阮

戊辰遼主至高邑得疾丁丑殂于藥城年四十六國人剖其腹實鹽數斗載之而北晉人謂之帝妃時述律太后及太弟李胡壽安王述律皆留臨潢唯東丹王倍之長子永康王兀欲在軍中南院大王耶律吼北院大王耶律洼議欲奉之兀欲聞其謀密召五院夷離董耶律安端問計安端請從之會有白臨潢來者安端因詐言太弟李胡死傳報軍中眾皆信之戊寅次于鎮陽吼洼奉兀欲即位柩前更名阮甲申次定州命天德朔古解州里等護柩先赴臨潢述律太后不哭曰待諸部寧一如故則葬汝矣初太祖妣于扶餘述律后

殺從行大臣凡數十百人至是恐后復然故皆懼而奉阮云太宗撫定多方遠近向化建國號備法章釐庶務閱名實德政卓然為遼盛主故其世也境內作四京置六州軍城百五十有六縣二百九部族五十二屬國六十東漸于海西至于金山暨流沙北及于臚胸河南以白溝為界幅員萬里焉

遼主阮至恒州執趙延壽以歸

大宋之歿也趙延壽即日引兵入恒州自稱受遺詔令權知南朝軍國事遼主阮既即位延壽未之知也或說延壽曰契丹諸大人聚謀此必有變今漢兵不減萬人不若先事圖



之延壽不決下令以來月朔日於待賢館上  
事受文武官賀李崧以虜意不同事理難測  
延壽乃止遼主至恒州召延壽及張礪等飲  
遼王妃素以兄事延壽從容謂曰妹自上國  
來寧欲見之乎延壽因與遼主入良久遼主  
出謂張礪等曰魏王謀反已鎖之矣遂以麻  
蕃為中京留守居恒州晉文武士卒悉  
留獨以後宮宦者教坊自隨勒兵歸國

晉主知遠自太原南下遼崔延勳耿崇美等皆  
棄城北走河南州縣悉復為晉○遼蕭翰立唐  
訓王李從益為帝于大梁遂帥其師北歸從益

### 避位以迎晉主六月晉主知遠殺之

蕭翰在大梁聞晉主擁兵南下遼將多棄城  
而去亦欲北遁恐中原無主必大亂已不得  
從容而去乃矯遼主命以惠明宋子許王從  
益知南朝軍國事召已赴恒州從益與其母  
王淑妃匿於徽陵下宮不得已而出翰立以  
為帝而去從益即避位以迎晉主晉主命鄭  
州防禦使郭從義入大梁  
清宮密令殺從益及淑妃

### 遼蕭翰殺其平章事張礪于恒州

翰至恒州與留守麻荅以兵圍張礪第礪方  
臥病出見之翰數礪曰汝何故言於先帝曰

國人不可為節度使我以國舅留守汴州汝  
又諳我與解里好掠人財物子女何也今必  
殺汝趣令鎖之礪抗聲曰此國家大體安危  
所繫吾實言之欲殺即殺奚以鎖為是夕恚  
憤而卒

遼太后使其太弟李胡帥師禦遼主阮遇于秦

德泉李胡敗績

述律后聞遼主阮自立怒遣太弟李胡帥師  
拒之遼主至幽州聞之遣夷離董安端詳穩  
劉哥為前鋒遇李胡于秦德泉李胡戰敗走還

晉主知遠入大梁改國號漢○秋閏七月遼太

后自將禦遼主阮遇于橫渡太后罷兵遼主入

臨潢

李胡敗還述律后乃親帥師禦遼主閏七月  
遼主次潢河太后李胡整兵陳于橫渡夾岸  
而軍惕隱耶律屋質言于后曰太弟永康王  
皆太祖子孫神器非移他族太后宜思長計  
后乃遣屋質授書于遼主議和遼主初不從  
屋質譬解之遼主良久曰若何而和屋質曰  
與太后相見各紓忿恚而和之不難不然決  
戰非晚遼主然之遣宣徽使耶律海思詣后



約和往返數日議始定於是遼主與后相見交語責讓殊無和意屋質借謁者籌執之謂后曰昔人皇王在何故立嗣聖后曰太祖遺旨屋質又謂遼主曰大王何故擅立遼主曰人皇王當立而不立所以去之屋質正色曰人皇王捨父母之國而奔唐子道當如是耶大王見太后不少遜謝惟怨是尋太后牽于偏愛託先帝遺命妄授神器如此何敢望和當速交戰執籌而退后泣曰向太祖遭諸弟亂天下荼毒創痍未起庸可再乎乃索籌一遼主曰父不為而子為之又誰咎也亦取籌而執左右感激大慟后復謂屋質曰議既定神器竟誰歸屋質曰永康王順天合人復何疑李胡在側怒曰我在兀欲安得立屋質曰

奈公酷暴失人心何且大王世嫡也誰敢奪之后顧李胡曰昔我與太祖愛汝異於諸子諺云偏愛之子不保業我非不欲立汝汝自不能矣議遂定后罷兵遼主遂入上京尊母


蕭氏為

太后

遼主阮幽其祖母述律氏叔父李胡于祖州

李胡以不得立居常怏怏述律后既鍾愛之因與謀廢立遼主遂幽后及李胡于太祖墓側

唐以留從効為清源軍節度使




初閩指揮使朱文進與連重遇弒其主曦文  
 進自稱閩王署其黨為刺史泉州散員指揮  
 使留從効謀興復王氏乃與僊遊人陳洪進  
 等夜踰城劫庫兵殺刺史黃紹頗傳首于殷  
 王廷政及南唐滅殷取汀建吳越亦取福州  
 從効知王氏不復可輔乃以兵劫刺史王繼  
 勳執之歸于唐自領漳泉留後唐即以泉州  
 為清源軍授從効節度使閩中自是分為二  
 矣從効出自寒微知人疾苦在郡專以勤儉  
 養民為務自奉甚簡每言我素貧賤不可忘  
 本民甚愛之部內安治王氏有二女  
 嫁為郡人妻從効謹事之終身焉

晉故將何福進逐遼留守麻荅以恒州歸漢漢

以馮道為太師

麻荅貪猾殘忍民間有珍貨美女必奪取之  
 又捕村民誣以為盜披面抉目焚灸而殺之  
 懸人肝膽手足飲食啓居於其間遼所留兵  
 不滿二千麻荅常疑漢兵稍稍廢省又損其  
 食以飼胡兵眾心怨憤聞漢主入大梁皆有  
 南歸之志前穎州防禦使何福進控鶴指揮  
 使李榮潛結軍中壯士謀攻遼兵奪守門兵  
 殺十餘人因突入府據甲庫召漢兵及市人  
 給鎧仗焚牙門與遼兵戰榮召諸將并力指  
 揮使白再榮狐疑不得已而行諸將繼至烟  
 火四起鼓譟震地麻荅等大驚載寶貨家屬  
 走保北城而漢兵無所統一貪狡者乘亂剽



遼史卷之五十一 四十二

掠懦者竄匿八月朔遼兵自北門入勢復振  
漢民死者二千餘人前磁州刺史李穀恐事  
不濟請馮道等至戰所慰勉士卒士卒爭自  
奮會日暮有村民數千謀於城外欲奪遼人  
寶貨婦女遼人懼而北遁麻荅崔延勳皆奔  
走定州與義武節度使耶律郎五合馮道等  
四出安撫兵民眾推道為節度使道曰我書  
生也宜擇諸將為留後遂以白再榮權知留  
後具以狀聞于漢主漢主以馮道為太師遣  
飛龍使李彥從將兵赴之再榮貪昧猜忌恒  
州人士苦之號曰白麻荅云

遼主追謚其考人皇王倍為帝封安端為明王

以至東丹

人皇王之見殺也有僧收瘞之晉高祖改葬  
以王禮遼太宗取而葬諸暨無間之山至是  
追謚曰讓國皇帝廟號義宗  
而以安端主東丹封明王

戊申 漢隱帝承祐乾祐 春正月遼以韓延徽為南

府宰相

遼北南二府宰相掌佐理軍國之大政北府  
則其宗姓世預其選南府則其外戚世居其  
職非二者不輕命焉其北樞密院則掌兵機  
武選群牧之政凡契丹軍馬皆屬之南樞密

資治通鑑綱目續編 漢隱帝承祐乾祐 五十二 郁尚

院則掌文銓部族丁賦之政凡契丹人民皆屬之所謂北衙不理民南衙不主兵也又改迭刺部夷離董為北南二大王掌部族軍民之政此皆遼之宰相也至於惕隱治宗姓林牙掌文告又其貴近之職焉

### 二月漢主壽殂子承祐立

壽即知遠也

### 三月遼麻荅焚掠定州而去孫方簡入城據之

遼義武節度使邯律郎五懼華人為變與麻荅焚掠定州悉驅其人棄城北去前義武節

度使孫方簡自狼山帥眾還據定州因以其弟行友方遇為易秦州刺史每遼兵南下才簡兄弟奔命遼人頗憚之由是晉末州縣陷于遼者皆復為漢有矣麻荅至其國伏誅

### 冬十月遼趙延壽死

已漢乾祐二年春二月遼遷故晉王石重貴於西凡五國三鎮

### 建州

晉李太后請遼主請依漢人城寨之外給田耕桑以自贍遼主許之并晉王遷于建州未至安太妃卒于路遺令焚骨南向颺之既至建州得田五十餘頃令從者耕以給食頃之

遼壽安王述律遣騎取晉王寵姬趙氏聶氏二人以去

冬十月遼主侵漢貝鄴深州

庚漢乾祐三年春二月遼建政事省○秋八月

戊○是歲漢亡故晉太后李氏卒于遼

后病無醫藥惟與晉王仰天號泣戟手罵杜威李守貞曰吾死不置汝

冬十月遼主侵漢

遼主南伐攻下安平內丘東鹿等城大獲而去

十一月漢郭威弒其主承祐迎武寧節度使贊

于徐州○漢郭威帥師伐遼至澶州威自立而

還廢贊為湘陰公○高麗王武卒子昭立

辛周大祖郭威廣順元年○北漢主劉昺乾祐亥四年○遼穆宗璟應曆元年○是歲周代漢

北漢建國凡六國二鎮

春正月郭威稱皇帝國號周○周主威弒湘陰

公于宋州○漢河東節度使劉崇稱帝于晉陽

崇贊父也贊既被弑崇乃稱帝仍用漢乾祐年號有并汾忻代嵐憲隆蔚沁遼麟石十二州

二月周使姚漢英如遼遼人執之

以周用國禮也

夏六月漢主乞師于遼遼遣使册漢主崇為大

漢神武皇帝

漢主遣其子承嗣將兵伐周不克遂遣使稱姪乞援于遼遼主遣政事令燕王牒蠟樞密

使高勳册漢主為大漢神武皇帝漢主更名是

秋九月遼泰寧王察割弑其主阮而自立壽安

王璟誅察割而代之

北漢主劉昺遣兵伐周遼主自將會之諸部不欲南行遼主強之行至歸化州祭讓國皇帝于行宮羣臣皆醉明王安端之子泰寧王察割作亂弑遼主而自立壽安王璟小字述律太宗長子也避亂于南山耶律屋質亟遣人召諸王及喻禁衛長皮室等同力討賊復遣弟冲迎璟璟猶豫不敢出屋質曰大王嗣聖子賊若得之必不相容大王死羣臣將誰

事耶瑛悟乃會諸部討察割鬻而殺之瑛遂即位是為天順皇帝改元應曆葬世宗于顯州西山以屋質知國事北漢主果復以叔父事之請兵以伐周世宗年少好遊戲每夜酣飲達旦乃寐日中方起國人謂之睡帝

冬十一月漢遼會師伐周圍晉州而去

遼遣兵五萬會北漢兵伐周漢主自將兵二萬攻晉州三面置寨晝夜攻之周遣王峻帥諸軍救晉漢軍乏食會遼帥聞峻至而遁漢主亦還峻入晉州遼師死者什三四漢主始息意於進取漢土瘠民貧內供軍國外奉遼貢賦繁役重民不聊生多逃于周境

壬周廣順二年凡六國二鎮夏六月周侵漢遼救之○冬十一月

己卯日南至遼行拜日禮○十二月遼明

王安端卒○周以折從阮為靜難軍節度使

鎮府州

癸周廣順三年凡六國二鎮夏六月遼太后述律氏卒

謚貞烈葬祖陵

甲周世宗榮顯德元年春正月周主歲殂晉王榮

寅年○凡六國二鎮周大祖廣順三年

立○二月漢主以遼師伐周三月及周主戰于


高平漢師敗績

北漢主聞周太祖殂甚喜乞師于遼以伐周  
遼遣政事令耶律敵祿將萬騎如晉陽漢主  
自將三萬與遼兵趣潞州周主命馮道奉太  
祖梓宮赴山陵而自將禦之漢主陣于高平  
南周主與戰右軍潰周主急親犯矢石督之  
馬直軍使趙匡胤謂同列曰主危如此吾屬  
何得不致死乃與張永德各帥二千人進戰  
匡胤以身先士卒馳犯漢師士卒死戰無不  
一當百漢師披靡羣將乘勝而前漢師大敗  
敵祿畏周之強不敢救全軍而退漢主帥其

餘眾萬餘阻澗而軍周師薄之漢主復敗傷  
尸滿谷委棄御物輜重器械雜畜不可勝紀  
漢主帥百餘騎晝夜北走所至得食未舉筋  
或傳周兵至輒蒼皇而去衰老力憊殆不能  
支僅得入晉陽收散卒繕甲兵完城塹以  
備周遣王得中送耶律敵祿還遼且謝之

周以趙匡胤為殿前都虞候

匡胤涿郡人四世祖毗唐幽都令生瑛唐御  
史中丞瑛生敬涿州刺史敬生弘殷周檢校  
司徒馬軍都指揮使弘殷娶杜氏生匡胤於  
洛陽夾馬營及長容貌雄偉器度豁如識者  
知非常人漢初漫遊無所遇舍襄陽僧寺有  
老僧善術數顧之曰吾厚贐汝北往則有遇





美匪亂從之會周太祖以樞密使討李守貞于河中匪亂應募居帳下太祖即帝位補東西班行首再轉開封府馬直軍使高平之戰功冠群校張永德稱其勞故有是命年二十八

夏四月周符彥卿帥師侵漢五月及遼耶律撻

烈戰于忻口周師敗績

周主遣行營都部署符彥卿督諸將攻北漢入漢境其民困於重賦爭以食物迎勞願助軍須以攻晉陽遂降漢汾遼憲嵐石沁忻七州周主因自帥大軍自潞州趨晉陽環城四

十里旗幟不絕遼主聞之使南院大王撻烈將騎數千屯忻代之間彥卿擊之撻烈退保忻口彥卿前鋒史彥超恃勇輕進與遼兵戰敗死彥卿帥兵還晉陽周主攻城久而不克會久雨士卒疲病及彥超死乃班師還軍匆遽焚棄芻糧數十萬所得漢州縣復皆失之漢主憂憤成疾以政事悉委其子承鈞

冬十一月漢主果殂子鈞立遼遣使冊之

漢主果殂子鈞立遣使告哀于遼且求封冊上表稱男遼王遣使弔祭冊命為漢帝賜詔稱兒

資治通鑑綱目卷之六十三 周顯德三年 三十七

周以折從阮為邠寧節度使其子德辰為靜難

軍節度使

父子俱領節鎮時人榮之

乙卯周顯德二年春正月周以遼降將張藏英為

汧邊巡檢使

遼屢攻周河北輕騎深入周主患之問遼降將張藏英以備邊之策藏英具陳地形要害請列置戍兵募邊人驍勇者厚其廩給自請將之隨宜討擊周主從其言自是河南之民

始得休息

周以曹元忠為歸義軍節度使

沙州自天寶末陷于西羌大中五年張義潮以州歸唐詔建沙州為歸義軍授義潮節度使領河沙甘肅伊西等州觀察使義潮入朝以從子惟深領留後梁初張氏之後絕州人推長史曹義金為帥義金死子元忠嗣至是入貢于周故命之

丙辰周顯德三年春正月周主伐唐圍壽州使趙

匡胤帥師入滁州復大敗唐師于六合

資治通鑑綱目卷之六十三 周顯德三年 三十七

周主自將攻唐淮南圍壽州衆凡數十萬遣  
 殿前都虞侯趙匡胤擊唐兵于塗山匡胤大  
 敗唐師于渦口斬其監軍何延錫等奪戰艦  
 五千餘艘而還二月周主復遣匡胤倍道襲  
 唐清流關唐守將皇甫暉姚鳳驚走入滁州  
 斷橋自保匡胤躍馬麾兵涉水直抵城下暉  
 曰人各爲其主願容成列而戰匡胤笑而許  
 之暉整衆而出匡胤突陣擊暉鳳皆擒之遂  
 克滁州至夜匡胤父馬軍副指揮使弘殷引  
 兵叩城門匡胤曰父子雖至親城門王事也  
 不敢奉命明日乃得入匡胤自是威名日盛  
 每臨陣必以繁纓飾馬鎧仗鮮明或曰如此  
 爲敵所識匡胤曰吾固欲其識之耳三月周  
 主至泚橋薄壽州城匡胤乘皮船入壽春壕

中城上發連弩射之矢如大椽牙將張瓊以  
 身蔽匡胤矢中瓊髀死而復蘇鏃著骨不可  
 出瓊飲酒一大卮令人破骨出之血流數升  
 神色自若四月唐元帥齊王景達帥師拒周  
 周主遣匡胤帥師屯六合時唐兵攻揚州韓  
 令坤棄城走匡胤令曰揚州兵有過六合者  
 折其足令坤懼而止遂敗唐兵于揚州城下  
 唐齊王景達帥師濟江距六合二十里設柵  
 不進諸將請擊之匡胤曰吾衆不滿二千若  
 往擊之彼必見吾衆寡矣不若俟其至破之  
 必矣居數日唐兵趣六合匡胤奮擊大破之  
 殺獲近五千人溺死其衆於是唐之精卒盡  
 矣是戰也將士有不致力者匡胤陽爲督戰  
 以劔斫其皮笠明日徧閱其笠有劔跡者數

十人皆斬之由是匪亂所部兵莫敢不盡死矣

冬十月周以趙匡胤為定國軍節度使兼殿前

都指揮使

匡胤之入滁也得判官趙普與語大悅之會獲盜百餘匡胤將盡殺焉普請先訊鞫然後決所活者什七八匡胤大奇其才留置左右至是以為節度推官普幽州薊人也

十一月周召華山隱士陳搏至大梁以為諫議

大夫搏不受

搏亳州真源人嘗舉滑長興中進士不為選不復干祿以山水為樂因服氣辟穀日飲酒數杯而已歷二十餘年乃隱華山雲臺觀每寢處多百餘日不起周主召至汴問以飛升黃白之術對曰陛下為天子當以治天下為務安用此為命為諫議大夫固辭不受乃遣還華山

丁巳周顯德四年春三月周主伐唐使趙匡胤帥

師絕唐餉道壽州乃降

周主命李重進圍壽州久不克遂復親征軍于紫金山南命趙匡胤擊唐列寨破之斷其

易文

甬道由是唐兵首尾不相救壽州遂降于周

吐蕃首領折連支逐河西節度使申師厚

涼州自唐末為羈縻然猶請命于中國至是折連支等逐申師厚而奉其土人為帥與中國始絕矣


戊戌月顯德五年凡六國二鎮

巳未周顯德六年春二月遼政事令韓延徽卒○

夏四月周主伐遼克關南諸州遂趨幽州五月

周主有疾乃還

周主伐遼四月次滄州即日率步騎數萬直趨遼境遼寧州刺史王洪舉城降周主命韓通為陸路都部署趙匡胤為水路都部署周主自御龍舟泐流而北舳艫數十里至益津關遼守將終廷輝以城降遂登陸而西趙匡胤先至瓦橋關遼守將姚斌莫州刺史劉楚信皆舉城降五月遼瀛口關及瀛州降於是關南悉平周主宴諸將于營議取幽州諸將曰陛下離京四十二日兵不血刃取燕南之地此不世之功也今虜騎皆聚幽州之北未宜深入周主不悅趣先鋒劉重進先發據固安周主自至安陽水命作橋會日暮還宿



瓦橋是日周王不豫乃罷兵南還孫行友拔  
遼易州斬其刺史李在欽周王詔以瓦梁橋  
為雄州益津關為霸州  
今陳思讓韓令坤戍之

遼以高模翰為中臺省左相

模翰一名松渤海人善騎射太祖知其才委  
任心腹之事立晉之功模翰第一太宗南伐  
其功尤多至是  
以右相改左相

六月周以趙匡胤為歸德軍節度使兼殿前都

點檢

周王自伐遼還在道閱四方文書得韋囊中  
有木三尺餘題曰點檢作天子時張永德為  
點檢永德周懿親有功周王疑之遂以  
匡胤代永德匡胤以趙普為掌書記

周主榮殂子梁王宗訓立

世宗殂年三十九子梁王宗訓立  
生七年矣尊皇后符氏為太后

遼遣使如唐周人殺之

唐屢通好于遼至是遼遣使報聘周泰州團  
練使荆罕儒募刺客於道殺之自是遼與南  
唐遂絕

漢書卷之九

冬十一月漢遼會師伐周

